

《中國地方志薈萃》編委會 編

中國地方志薈萃

中南卷·第一輯 拾貳

中國地方志薈萃

中南卷·第一輯

拾

貳

《中國地方志薈萃》編委會 編



九州出版社
JIUZHOU PRESS

全國百佳圖書出版單位

乾隆襄陽府志（五）

出版說明

乾隆襄陽府志（五）

（清）陳鏐纂修

唐白居易襄陽別駕辨

本朝 段嘉梅

唐白居易字樂天初爲翰林學士以言事貶江州司馬累遷刑部侍郎晉太子少傅以刑部尚書致仕其所歷官爵較如也丙辰八月余至襄陽見通衢中有風聲政教德業文章四坊凡古今來官於襄與生於襄者悉題名其上而文章坊載白居易名及至學宮名宦祠亦祀唐襄州別駕白居易隨考郡志宦蹟載白居易字樂天太原人徙韓城累擢襄州別駕云云如志言則樂天之別駕於襄也不旣信而有徵乎及考新唐書列傳曰白居易字樂天其先蓋

太原人北齊五兵尚書建有功於時賜田韓城子孫家焉
又徙下邳父季庚爲彭城令李正己之叛說刺史李洎自
歸累擢襄州別駕是襄州別駕乃樂天父季庚也襄志所
錄卽本傳中語而於太原人下截去十三字又於韓城下
截去子孫家焉以下二十七字因以累擢襄州別駕屬之
樂天不知樂天生於唐代宗大歷七年壬子歲綱目所書
徐州刺史李洎以州降乃在德宗建中二年辛酉歲壬子
去辛酉十年何能有說洎歸降事且樂天以德宗貞元四
年舉進士而別駕公歿於貞元十年樂天自誤襄州別駕

府君事狀甚詳卽李商隱所作樂天墓碑亦云父名季庚
襄州別駕云是襄陽別駕之爲樂天父也明矣今以父官
加之子祀於學使後人知其子不知其父奚可哉嗟夫樂
天名臣也宦蹟彰彰耳目間其舛錯也如此外此之傳聞
失實更當何如矣自漢儒專家之學廢後世得書甚易士
多務泛覽而不務精核訛以傳訛豈僅魯魚帝虎而已哉



八蜡廟碑記


本朝尹會一

蜡之祭始於伊耆氏冬十二月合聚萬物而索饗之所以報本反始而息老物也而所重者則有八一先嗇二司嗇三農四郵表畷五猫虎六坊七水庸八昆蟲以其尤有功於田也故尚焉夫古之君子使之則必報之雖以猫虎昆蟲皆得上配先嗇司嗇所謂仁之至義之盡者乎故曰八蜡之祭爲民設教也厚矣襄陽故望郡山川社稷昔聖前賢諸大祀煌煌具備而八蜡之祀獨闕焉豈明季兵燹之後廢而弗舉乎余守茲土每念及之不敢忘也雍正七年

鄰郡報蝗余時往鄂城見捕蝗之使相望於道心竊滋慰
遂竭誠默禱幸神福襄民蝗不入境且比年以來歲物滋
豐地方無水旱之災與傳所云順成之方其蠟乃通者不
更有合歟爰擇地於城南社稷壇西捐薄俸而建廟以祀
亦以云報也雖然有其舉之莫敢廢焉可以云報已乎余
之理襄也固將以必敬而必誠者報

君恩之高厚以一張而一弛者報民俗之醇良因以不數而不
疏者報神庥之順正繼自今官和衷民從欲神降祥幽明
上下有嘉德而無違心明禋介福相報益彰歲歲飲蜡擊

鼓吹豳農夫之慶邦家之光永永無極豈不盛歟若乃百
日之蜡一日之澤脫履升堂飲無算謂勞農以休息之
可耳至於食飲無度舉國若狂非設教之本意亦無取焉
是役也始於雍正八年春三月成於冬十月蓋力出於官
而不勞民故次第經營緩以告竣亦蜡以息物之意云



重脩米南宮祠碑記

本朝 魯之裕

古人蓄道德而能文章其所以不朽而存者固不待於功業之著况於藝乎雖然藝也而道寓焉雖聖人不廢蓋藝視乎其品人品貴則其藝必精卽末可識其本矣自魏晉來迄於唐宋文人之藝競尚書畫宋之傳者不一而米南宮兼擅焉所傳畫本後世摹仿失真惟法書之壽金石者至今流布天下始予好晉王右軍書亦嘗涉獵歷代諸名帖謾謂南宮筆法以顛而契乎波磔綰牽之趣旣而游歷中外未獲肆其力也茲乃奉

命觀察安襄鄖郡乃得造南宮故廬接見其裔孫生員曰
澍者夫襄之在昔也者舊所傳文德武功之彥接踵而興
迨於今故里遺裔守其先人塚土使人過而識之而因致
其憑弔焉者邈乎不可復得南宮先生之裔獨以蕃庶稱
夫何先生之艱於名位而克蕃於後裔耶予也方媿無明
作才特有所建立以惠我三郡民而興廢舉墜予所不敢
辭也於是舉凡先哲之生於襄仕於襄而或流寓於襄者
莫不爲之新其宮葺其基而更爲之復其子孫焉若降中
若峴首若太和山之紫霄五龍諸宮若穀城縣之王政橋

雙溝之興仁橋均州之近恩橋襄陽之鳳凰山宏慶宮關
壯繆之五代祠●費數千百金咸捐俸而力成之至若南
宮先生之祠則更爲之拓其隘深廣其址而屬澍重新之
越三歲落成澍復再拜請予記諸石予攷先生爲人癖古
愛石至於招時忌訕不悔而當其興至揮毫顛趣洋溢遂
爲當時後世所珍重雖寸素尺絹寶之若拱璧焉是豈造
物之豐此嗇彼有定數耶抑古君子之生與沒也各有其
幸不幸而不可以究詰也耶夫先生道德文章未必不逮
其書畫而世之傳先生者以藝不以道予又竊疑先生之

藝近乎道而道因以寓於藝特其蘊而未發者吾將決其
不於身必於後人矣樹也尚其率諸族勉乎哉

重脩武侯祠記

本朝 李敏學

武侯當潛龍勿用之時而遁跡耕農無心聞達想其抱膝
長吟志量固深遠矣逮幡然三顧之殷君臣魚水其所建
豎雖伊呂復生堪爲伯仲是豈取辨於臨時哉夫固素裕
於草廬未出之先者也昔人有言觀其處可以知其出於
其出愈以重其處則今日之巍然祠宇於襄中者洵與莘
野之蹤並垂於不朽也乾隆丙子余鳩工飭材新其祠宇
雖規模仍舊而瞻觀丕煥嗚呼孰使我穆然於山高水長
神往而弗置乎